

Regional News Unit AIR Aizawl
Tuesday, June 17, 2025
Time - 7:30 -7:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

- Dharti Aaba Janjativa Gram Utkarsh Abhiyan (DAJGUA) Awareness & Benefit Saturation Camp chu Mizorama neih turin Chief Minister Pu Lalduhoma'n a hawng.
- Chakma Autonomous District Council a BJP hruaitu, CEM Pu Molin Kumar Chakma chu nimin khan rintawklohna Motion hmangin CEM atanga paihthlak a ni.
- India leh Cyprus chuan firfiaka chetna reng reng chu an dem takzet tih an puang.
- Ahmedabad thlawhna chesual chhui tura sawrkar din high-level Committee chu a hmasa ber atan nimin khan an thukhawm.

<><><>

DAJGUA

India in kum 2047-a ram changkang anih hun tur atana hmalakna kalkawnga tribal mipuite zirtirna leh an mamawh zualpui pekna tura hmalakna Dharti Aaba Janjativa Gram Utkarsh Abhiyan (DAJGUA) Awareness & Benefit Saturation Camp chu Mizorama kalpui turin nimin khan Chief Minister Pu Lalduhoma'n a hawng.

Planning & Programme Implementation Conference Hall-a DAJGUA a hawwna ah Chief Minister Pu Lalduhoma chuan hmalakna chu tun thla chhunga kalpui ani a ti a, Mizoram mipui zaa sawmkua leh pali aia tam chu tribal anni tih sawiin Central sawrkarin tribal te hamthatna a rawn duan chu state pumpui hamthatna a ni nghal tih sawiin State sawrkarin hmasawwna scheme a duan pawh tribal hamthatna tur a ni nghal zel tih a sawi.

Chief Minister chuan sawrkar laipuiin camp chu tha taka kalpui a, state dangte entawntlak khawpa tihlawhtling turin an beisei tih sawiin a mawhphurtu zawng zawngten tha taka hlen theuh turin a chah bawk.

DAJGUA hi sawrkar laipui flagship programme niin a kalpuitu tur line department 17 a thlang a, heng line department te hian thawk hovin India ram tribal awmna district thlanchhuah 549 ah te hna an thawk ang. Mizoram bikah chuan line department 14 ten district 11 a mihring nuai li vel huamin khaw 383 ah kalpui a ni.

DAJGUA hi District hrang hrangah pawh hawn nghal a ni a, Sub-Divisional Officer Pu Ngulzathuama chuan nimin khan Champhai District ah a hawng a, khaw 30 ah kalpui tur a ni tih a sawi a. Mamit District Bawrhsap Pu K Laltdawmlova pawhin nimin khan DC Conference Hall, Mamit-ah hawngin, Mamit district a khaw 57 chu he scheme kalpui tura thlan an ni tih a sawi.

Khawzawl Bawrhsap Pu K. Vanlalthiana pawhin nimin khan Khawzawl DC office tualah Khawzawl District chhunga IEC Campaign on DAJGUA a hawng a, mipuite tana hamthatna an pek theih zawng zawng te a tam thei ang ber pe chhuak thei tura theihtawp chhuah turin sawrkar hotute a sawm a, mipuiin an tangkai puia an hlawkpui ngei theih a beisei thu a sawi bawk a ni.

<><><>

MNF

MNF Vice President, Opposition leader ni bawk, Pu Lalchhandama Ralte chuan Mizorama sorkarna chelh mektu, financial management thiam intiten sum enkawl tur an la sawi chhuak lo a ti.

Nimina Aizawl Mizo Hnam Run chhung inkhawm ah thusawiin Pu Lalchhandama Ralte chuan, tuna Mizorama sorkarna chelh mektu, kum khat leh a chanve an sorkar hnuah, tha bik, fel bik, financial management thiam bik nia insawite chuan Delhi tlangah project um chhuah hlawhtling an neih a la hre lo tih sawiin, Share of taxes, puk chawp, CSS pangngai lo kal bak manage tur an la nei lova. SASCI sum an ti-lapse a, heti chungin Finance Minister-in balance cheng vbc sang chuang nei anga a sawi chu mak a tih thu a sawi.

Pu Lalchhandama chuan State sum hmuhna pawimawh tak GST-ah ni se nikum nen khaikhinin kuminah Jan atanga May thla chhung minus hlirin an kal a. Thenawm ram buai Manipur-ah pawhin kumin May thla khan an GST lakkhawm zat chu zaa 102 a nih theih laiin, Mizoram chu –zaa 26 a ni a. ZPM kaihhruai sorkar chu a che chhe hle a ni a ti.

Mizoramin kum liamta (2024-25) a phak loh em em lai hian, nikum vek khan Mizoram chu India ram pum GST lakkhawm lamah a hniam zual 5-ah a awm a, heta lang ve dangte chu Union Territory vek an ni tih sawiin, mithiam zawkte chuan GST Collection a hniam chhan hi hmasawinna hnathawh a tlem vang leh central ministry hnuiaia project works hai luh a tlem vang niin an sawi a ti bawk.

Opposition Leader chuan ZPM kaihhruai Mizoram sorkar chuan sum pawh luh an nei lo a, sum che vel tur a awm lo tih sawiin, sorkar kum liamtaah khan fiscal deficit a nasa hle, a ti a. Tunah hian cheng vbc 3000 vel an puk tawh ni a sawiin, sum indaih lohna chu kum 2024-25 Budget ah chuan GSDP atangin puk tel lova sum indaih lohna chu zaa 7.64 chuang a ni a ti a. Hei hi Covid-19 hnu lamah a sang hle a. FC 15-na leh The Mizoram FRBM (Amendment) Act, 2020 chuan Fiscal Deficit % of GSDP hi ‘3% target’ tur a tih laiin, Sorkar kum kal meka fiscal deficit target an dah pawh zaa 4.58 a ni a. GST Collection a chhiat chhan leh Fiscal Deficit a san viau chhan hi Financial Management an thiam loh vang a nih loh chuan a chhan dang puh tur a vang hle a ni a ti.

<><><>

CADC

Chakma Autonomous District Council a BJP hruaitu, CEM Pu Molin Kumar Chakma chu nimin khan rintawklohna Motion hmangin CEM atanga paihthlak a ni.

Chakma Autonomous District Council chuan vawiin khan CADC Session Hall, Chawngte ah, Chairman, Pu Lakhon Chakma kaihruaiin Special Session an nei a, Chief Executive Member, Pu Molin Kumar Chakma chu No-Confidence Motion hmanga paihthlak a ni.

He motion hi Zoram People’s Movement (ZPM) member, Rengkashya Constituency atanga MDC thlan tlin, Pu Doymoy Daveng Chakma chuan a pulut a, CEM Pu Molin Kumar Chakma hian sorkarna chelh chhunzawm turin member a ngah tawh tawh lova, hruaitu thlak danglam ngai a nih thu a sawi.

Motion hi sawiho nghal niin, vote lak a ni a, Session atel Elected Member 17 zinga MDC 15 chuan motion hi an thlawp a, MDC 1 chuan motion thlawp lo zawngin a vote thung. MNF, MDC awmchhun, Pu Rasik Mohan Chakma chuan vote a thlak lo. BJP hruaitu, CEM paih duhtu an tam zawk vangin, CEM chu paihthlak a ni.

CADC 11-na ah hian CEM a tan Pu Rasik Mohan Chakma lakluh anih hnuah, kumin February ni 27 khan Pu Molin Kumar Chakma hian a thlak a, CADC ah hian thlantlin member 20 awmin, Member pakhat thita ai thlan anih loh avangin tun dinhmuna Member 19 an awm mek a, ZPM in member 16 neiin, MNF member 1 leh BJP Member 2 an awm mek a, BJP Member Pu Nirupam Chakma chu Session ah a tello a mi. Kar kalta khan Chakma Autonomous District Council huamchhunga tlawmngai pawl 3 te chuan kar kalta khan CADC chu thla 6 chhung Governor Rule ah dah turin Larsap Gen (Retd) VK Singh a hnenah an thlen a, Young Chakma Association (YCA), Mizoram Chakma Students’ Union (MCSU), leh Chakma Mahila Samiti te hian memorandum siamin CADC buaina a thuk hle tih an sawi a, tunah hian sorkarna inthlakthlengna thleng leh mai tur khawpin boruak a inmun mek an ti a ni.

Term hmasa khan CADC ah vawi 5 sorkar a inthlak a, tun term ah hian vawi 2 inthlak leh tawhin, tunah pawh politics boruak a inlumlet leh mek a, hei hi MDC te chu chan tha zawk chang tur leh hnalak naah pawh duhsak an nih tur thu a thlem an nih thin vang a ni an ti a, Governor chu inrawlh thuai se an ti a ni.

Hei bakah hian CADC sum dinhmun chu a chhe hle an ti a, thla 4 chhung sorkarin hlawh a pe tawh loa, kumin sorkar kum kalmekah hian thla 8 vel chu bathlaua kal tur ni a rinlawk a nih thu an sawi a, dan lova hnalak hrang hrang te chuan sum leh pai dinhmun hi a tichhe zual a ni an ti bawh a ni. An memorandum a an tarlan danin, dan lova sorkar hna pek hi 200 a chuang a, hei hi kum 2022 hnua lak te niin hemi chungchang pawh hi chhui chian ngei a ngai a ni an ti.

<><><>

11 yrs MODI GOVT

MLA Dr.K.Beichhualeh Pu K.Hrahmo ten kum 11 chhunga Prime Minister Pu Narendra Modi kaihhruai Sorkar hmalakna hrang hrangte nimin khan Siaha Press Club ah chanchinbu mite kawmin an puangzar a, he hun hi MDC Pu Delson Notlia BJP National Minority Secretary chuan a kaihruai.

Dr.K.Beichhua chuan kum 11 chhunga Pu Narendra Modi kaihhruai Sorkar chuan India hmel a tidanglam mek a ni tiin hmun kilkhawr bera awm Siaha District pawin nasa takin hma a sawn a ti a, Sawrkar laipuiin mirethei zawkte tana scheme hrang hrang a duante tha taka kalpui anih avangin mipuite intin ei leh in leh khawsakna a awlsam phah hle a ni a ti a, India zalenna kum 75 na lo thleng tur puala mi rethei chenna in nei lote in saksak vekna tur Housing for All te, rethei zawkte hnena a thlawna ration buhfai pek te, damdawi ina a thlawna inenkawlina pek te, lo neitu leh kut hnathawktu te tanpuina chi hrang hrang pek te bakah hmasawinna ruhrel bunna tur Special Assistance leh Mass Communication lamah nasa takin hma a la a, faina leh thanglimna lamah pawh chak taka hma la-in rah tha a chhuah mek niin a sawi bawk.

DR.K.Beichhua, MLA chuan Look East Policy pawh a taka thawk turin Act East Policy ah a let a, Mizoram pawh inkalpawhna lamah nasa takin hma a sawn bawk a, tunah phei chuan Aizawl kawtkai-ah Rail a lo lut tawh nghe nghe a ni, a ti a, tunhmaa mi harsa zawk te tana sum lo kal, kawng laka bothlau a awm thin chu tunah chuan an bank account ah him takin a lut tawh a, a ropui hle a ni, a ti bawk.

Pu K.Hrahmo, MLA pawhin PM Modi kaihhruai sawrkar chuan India rama retheihna umbo hi a thil tum lian ber pakhat a ni a ti a, tun dinhmunah India hi khawvela ram thil tih thei leh hausa ber 4 naah a awm mek a, India-in khawvela ber ni tura a tanlaknaah keini pawhin kan tihturte rinawm taka kan tih ve a ngai dawn a ni, a ti bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

India leh Cyprus chuan firfiaka chetna reng reng chu an dem takzet tih an puang. Remna leh muanna ti derthawng thei firfiaka chetna chi hrang hrante chu do turin ram pahnihten theihtawp chhuah an tum thu an sawi bawk. Nimina Prime Minister Narendra Modia leh Cyprus President Nikos Christodoulides ten thuchhuah intawm an sawiah hian he thu tarlangin ramri kana firfiaka chetna do turin an inrem tih an puang a ni.

Puan tawh angina Prime Minister Narendra Modia hi nimin khan Cyprus civil mite chawimawina sang Grand Cross of the Order of Makarios III hlan a ni a. Pu Modia chuan Chawimawina ropui tak an hlan chu lawmawm atih thu sawiin India mi zawng zawng aiawha dawng anih thu a sawi a ni.

Nimin vek khan Prime Minister Narendra Modia hoin India leh Cyprus aiawh sawrkar hotute an inia a. Pu Modia chuan India-Cyprus thawhdunna chu demcracy bulthutah ngeth takin a inthlung tih a sawi a. Hun tam tak paltlangin ngeht takin an thawkdun zel tih a sawi. Pu Modia chuan Cyprus Vision 2035 leh India in Viksit Bharat 2047 te chuan tum thuhmun an neiht thu sawiin kum 5 lo awm tura an thawhdunna tur ruahmanna road map siam a ni ang a ti bawk.

PM Modia hian Cyprus a tlawh hnu hian G7 Summit hmang turin Canada a pan lehngal a ni.

<><><>

HIGH LEVEL COMMITTEE

Ahmedabad thlawhna chesual chhui tura sawrkar din high-level Committee chu a hmasa ber atan nimin khan an thukhawm. He Committee hi Union Home Secretary Govind Mohan chuan a ho a. Ministry leh department hrang hrang atangin member telin an zingah hian Ministry of Civil Aviation Secretary te, Union Home Ministry Senior Official, Home Department official leh Gujarat State Disaster Response Authority, Ahmedabad Police Commissioner, Indian Air Force Director General of Inspection and Safety leh Civil Aviaition Director General te an tel a ni. He high level committee hian thla thum chhungin an thil hmuhchhuahte an thehlut ang.

<><><>